

ՆԱՄԱԿ ԽՄԲԱԳՐՈՒԹՅԱՆԸ

Հարգելի խմբագրություն.

Վերջերս ես կարդացի «Արշակ Երկրորդ» վեպը (Երևան, 1977): Ինչպես հայտնի է, պատմական անցյալը և մանավանդ սեփական ժողովրդիդ պատմությունը միշտ էլ հետաքրքրություն և հմայք ունի: Հաճույքով բացեցի գիրքը, սակայն զարմանքով փակեցի այն: Վեպը թողնում է տարօրինակ տպավորություն: Հեղինակ Պերճ Զեյթունցյանը, խոսելով հայ ժողովրդի պատմության IV դարի իրադարձությունների և մասնավորապես Արշակ II-ի գործունեության մասին, զարմանալի կերպով անտեսում է պատմական փաստերը: Բայց ինչո՞ւ Հեղինակը, ըստ երևույթին, կարծում է, որ գրողը իրավունք ունի փոխելու պատմությունը՝ ինչպես կամենա:

Դիմելով «Հանդեսի» խմբագրությանը, խնդրում եմ պարզաբանել, թե ճիշտ է, արդյոք, երբ գրողը հակասության մեջ է մտնում պատմական իրականության հետ:

Այդ հարցը ինձ հետաքրքրում է նաև աշխատանքի բերումով, ես աշխատում եմ որպես Գրքասերների ընկերության կենսականի բաժանմունքի պատասխանատու քարտուղար և կուղենալի պատասխան տալ բազմաթիվ ընթերցողների, որոնք հաճախ ինձ դիմում են այդ գրքի կապակցությամբ:

Ռ. ՄԿՐՏՉՅԱՆ

Խմբագրության կողմից.—Ընդառաջելով ընթերցողների ցանկությանը, «Հանդեսի» խմբագրությունը և Հայկական ՍՍՀ ԳԱ պատմության ինստիտուտը մտադիր են նամակում բարձրացված հարցի վերաբերյալ կազմակերպել քննարկում պատմաբանների, գրականագետների, գրողների և ընթերցողների մասնակցությամբ: